

撫新記程

卷

低亦丈餘岷崙中幹迤邐萬里至此脫沙變土結成厚壤有高至  
十丈無片石者土質莫厚於此矣汜西虎牢關再西成皋關陝路卽  
鴻溝也古今形勝必爭之地鋒鏑銷沉河山如昔青史幾行名姓北  
邙無數荒邱前人田地後人收說甚龍爭虎鬪耶

念九日因差車未齊小住一二日答客畢出南門十五里至關帝林  
一瞻拜相傳吳送聖帝元於魏魏武以王禮葬於此面南向直龍門  
伊闕相距十餘里伊水來朝外有屏障洛河繞於後邙山擁其北形  
勢氣脉均極佳勝郭景純葬經肇起於晉何當時亦合葬法如此也  
垣牆高仞餘縱橫百餘丈古松數千株望之蔚然而深秀三  
家在殿後有石門後入摩挲久兩小孔光滑膩手

禁人踐踏不得入正殿中懸

高廟御翰威靈於鑠四字兩旁懸

德宗景皇帝回鑾時

賜額餘多人聯額碑碣不可勝記瞻仰畢啜茗於僧舍而回日已暮矣  
是日先發十三車大風竟宵澈晝未息聞札馬營在洛東未及往  
三十日大風終日未行夕風止車裝齊明日必行矣發電西安並給  
晉兒書

二月初一日卯正行三十五里磁澗曾辛庵大令炳章備午飯新  
界也東有漢丞相朱買臣之神道碑神字以下皆埋入土好事者爲  
之耳午後行三十五里新安縣宿於高等小學堂曾令預備行館並

晚餐辭不獲已受之城東一里許漢函谷關楊僕恥爲關外人築此  
非秦關也登視之勢險路狹左右置雞鳴望氣台台上各植古柏一  
關門題漢函谷關四字新安城樓高踞西面正當其衝其扼塞更勝  
於函關有萬夫莫開之勢項王西上秦將拒諸侯兵於此莫之能禦  
亦地利不如人和也住定步出行台後門登北城牆牆踞山巔與東  
南隅奎樓山皆因回亂某令將兩山圈入城中以備戰守頗得形  
濶河過城南折而南而東而北復從關門外向東流去北來小河會  
之城之東南西三面突起三小山如三台南有大屏障北來山勢甚  
雄至此截然而止其結地當在北山前也聞自有明以來呂姓多名  
臣生其地至今稱爲呂家大山計行七十里



初二日卯正行三十里鑛門曾辛庵借行

大站東南有

棋盤山相傳卽王喬爛柯處午後天氣甚暖從者以爲可到澠池余  
先行二十里倡義橋二十里石河又三十里澠池縣張子政大令錫  
典備行館於高等小學堂住定後車僅到數輛泥深沒軌兩縣民壯  
修補未竣有住石河者有住十里鋪者楚兒坐予車知余住此派人  
將襪被來已二鼓賴此得安枕次早已午間人始到齊沿途順澗河  
西上日數渡縣西則澠水非澗河也澗河自黛眉山五龍潭發源從  
城東北來會之北有魚池南有藕池龍池或卽澠池之所由名歟  
初三日車到齊已十二鐘午飯後行二十五里英豪住路多泥淖車  
陷其中十餘馬併曳之始出行路之艱至此蔑加回憶余藩汴時曾

以開渠修路列爲功過派人督責今猶具文視之官民之疲良可慨  
矣張錫典送余至此辭去英豪之西卽陝州界旅店湫隘密雲欲雨  
心以爲慮夜夢還鄉遍晤家中老幼惟愛孫汴流未之見悲甚覺後  
知爲夢或來時恐汴流知之不放余行也瞞之而去至今夢魂中猶  
以爲憾歟抑小孫戀祖時常呼吾夢寐不安也亦奇矣

初四日卯正行二十里觀音堂陝州岳奎章直牧廷楷備尖膳途中  
陂陀上下非嶺卽溝溝則泥淖嶺則峻阪自英豪起肩輿前卽有四  
人曳緯而行名爲緯夫嶺峻故也向例顯官過境旅店支應地方差  
使派四人曳緯過山卽回不給錢余每人酌給飯錢四十文又二十  
五里硤石嶺卽肴陵前途泥深難行

有分住廟溝者岳令備行館於行宮舊址兩廂倒塌不堪惟前後厠及頭門完善硤石卽隋硤石塢唐硤石縣故地其東硤石嶺上下二十里盤曲如羊腸數爲上下一夫所守千人莫過眞要隘也道光十八年新開大路崎嶇難越嶠山二嶺一南一北其北陵爲文王避雨臺緊臨鎮北山勢雄厚松柏聳秀上有紫微宮供周文王神牌宮內有琉璃井山後有二郎洞其南陵爲夏后皋之墓相去十餘里晉敗秦師於嶠獲其三帥卽此地也自古以爲險要宜峻絕如此過時陰霧四塞雲靄蒼茫猶帶昏霾氣象疑項王阬秦卒故地距此不遠歟洛陽東西邛山土厚無石至漢函谷關石山陡峻新安以西路多碎石過硤石則巨石林立山勢雄峻潼關以東最爲險要古今戰場多

在於此至今過之猶陰氣逼人

初五日卯初卽行沿途大石嶙嶒所過溝塹泥深沒軌車陷其中人推馬曳半晌始出三里廟溝有關門據其東口名三里關頗扼險要二十里張毛過衛店嶺路僅容車兩岸壁立數仞無片石路漸乾二十里磁種岳直牧備午飯又三十里至陝州路乾多塵溝深十數丈無寸石土厚又過於鞏汜兩邑南望嶺漸平車行岡上甚廠闊北瀕河不見山城中荒涼甚有召公祠召公分陝而治遺蹟猶存祠內荒榛滿目有古甘棠樹乾枯不知幾許年有古鼎一在池北天井中前立一碑刻古鼎碑記四大字模糊不可辨餘多明代碑碣岳直牧爲余備行館於巡警講習所同城文武官吏皆來謁住定往答拜河陝



汝道胡端臣觀察祖謙頭門監唐河南道匾額署中冷落政肅刑清  
庶幾近之州署照壁外有古樹一株斜向西南傾生冬青六七棚垂  
如烏鵲巢狀甚奇異殆天地磅礴之氣所種歟黃補臣太守壽袞權  
稅於陝郊迎授餐意極殷摯復有送行詩云策馬向西林老臣愛國  
深天山萬里路師弟百年心新茁陽關柳高彈塞外琴縱橫定狼虎  
驚附愧知音

初六日卯初行出南門過澗河水濁入黃多開溝渠引水灌地大利  
也二里許南關有關門二橫亘大道中鎖鑰甚嚴旅店多在此出關  
入峽中兩岸深十數丈路狹而坦二十里溫塘大村落溫泉可浴泉  
水出山卽冷十數里大營村有土圩入東門出北門高原平闊北臨

黃河過河卽山西界也二十里曲沃鎮有行宮葉少蓮大令承祖備行館於此因前車已過余稍憩卽行二十里靈寶縣尖漢宏農郡也平原開曠南有土嶺亦不高峻居民皆住窯洞中城東多許姓神道碑前明大族也四世相國閥閱相承極一時之盛今已零落矣行館卽許姓舊宅正房三間一明兩暗作窯洞形甚堅固北距河八里許鹽局委員崔令雯隨同接送午後出南門過澱水卽唐朱溫逼昭宗東遷過此水僅餘小黃門十數人相隨者也西面兩山雄峙關樓高聳古函谷關也樓內塑老子像笑容可掬手持一書作說經狀尹喜侍右童子立左青牛伏於後若皆有所悚聽焉關前一石上刊殷直臣關龍逢之墓乾隆年建關門聯云未許田文能策馬願逢老子再

乘牛典雅可誦登樓遠眺大河前橫激水繞之靈寶當其衝眞險要  
也裴子伯謙河海崐崙錄云如假精兵萬人決黃河之流遮桃林之  
野雖開關延敵東諸侯將逡巡而返矣諒哉入關兩岸壁立溝路陡  
深數仞仰視青天寬不尋丈皆青白土結成數千年未嘗傾圯去秋  
大雨如注竟崩數十處溝路爲塞行人苦之二十里出溝渡河至稠  
桑驛店少不能住又行再入溝路寬僅容車二十里達子營宿日已  
昏黑闕鄉辦差家丁聽戲他往自尋荒店下榻土坑小屋不能禦風  
搯帳而臥楚兒等三人臥於前夜風大作怒號有聲是日計行百里  
初七日卯正行高原廠闊南北六十餘里東西近百里南則秦嶺高  
峻積雪未化北則中條山橫亘河朔黃流貫其中沿河數十里皆沃

壤水深土厚漢置宏農郡於靈寶有以也古稱桃林塞絕大戰場設有兵事非夾河上下不足以制全勝以堪輿家言論之秦嶺東行中條西向自太原東山南下回龍顧祖結穴於平陽蒲坂爲古帝王都會良不誣耳二十里闕鄉縣尖孔令繁昌備行館於大王廟廟前作挑水石埧二所以護城也近河分出兩沙夾河而下頗具形勢飯後行入溝路兩岸陡高數十丈十餘里一出溝溝前澗河橫流入黃有烟火十數家餘則絕壁懸崖塵土滿目西行入關者不絕於途四十里闕底鎮巡檢孫金塘來見余藩汴時所委也二十里潼關宿黃河兩岸突起大山河流如束帶潼關高踞嶺右扼其衝要水陸均難飛渡初入第一關卽金陡關攀籐而上東來函道首扼其衝大河繞於



唐以來稱爲重關天險豈虛也哉同城潼商道齊觀察蔭南潼關協桂聯輔和都司李君潼關廳劉際良均來接見廳轄軍戶五千餘皆昔年屯田守兵子孫隸於軍籍地糧悉征本色有風陵渡設巡檢一古風后陵寢所在也陵葬河中今失其處仍存渡名劉際良司馬備行館於五省行台甚宏敞中多唐槐晚復陳堯齋電速其西上堯齋已行至奉天值驗疫折回汴梁是日計行八十里實有百里初八日卯正出西門關門兩重甚雄狀標兵排隊行跪送禮甚不敢當地方文武官郊餞如禮西風大作霧霾不開數里不見人物經舊城基輿夫曰滿城也今無人矣十里釣橋東有漢太尉楊震墓四知

坊北二里許弓長楊家卽其後也黃河由此北曲矣三十五里華陰  
廟宿衛隊連日奔走疲乏稍歇半日入廟謁西嶽華山之神遍閱漢  
唐以後碑刻庭前古柏森天老槐仆地大逕數圍東北一株標名秦  
柏實唐宋時物也西南面已枯東北面樹皮深皴如老龍鱗一枝尙  
茂密小槐寄生其上我來撫觀恰合槐柏主人舊號矣攷西嶽華山  
漢建武中嘗使二千石歲時祠祀勒文於石至延熹初字已剝蝕宏  
農太守安國亭侯汝南袁逢重鐫文字卽世傳西嶽華山廟碑也關  
中漢碑此惟最古原石斷爛已不可復觀况秦柏乎登萬壽閣正對  
華嶽三峯惜天氣溟濛不得一觀廬山眞面爲憾前院西偏有老柏  
一株榜曰老子拴青牛處相傳老子偕尹喜出關拴青牛其上今樹

皮剝落而斑紋古秀如虎頭如靈芝無巧不備鄉人環禱香火極盛  
青牛樹旁生皂莢樹大可五六圍狀如連理根交於下枝抱於上相  
交處亦生芝紋如乾柏形尤奇其東有兩槐老不紀年南有唐元宗  
御製碑經火焚碎祇餘三半字廟基方廣佔地二百六七十畝築長  
垣圍之

聖朝兩次重修並費十餘萬金一椽一椽大皆合抱亦巨觀也華陰令陳  
協華字實生設行台於廟之東院故得詳觀之購廟碑數十種惟漢  
碑陰殘石最佳自出潼關西來柳陰夾道望之如硤路然皆三十年  
前左文襄西征時種植柳皆成材紋赤質堅作器具與皖豫蒲柳不  
同兩旁深溝流水潺潺灌地周匝每十數里一渠遠自華山引來稻

田藕池麥地均極肥美民力之勤地利之富較之河南氣象迥殊矣  
初九日卯正起密雲細雨冒雨行三十五里敷水尖華陰陳令送至  
此備午餐飯後行雨未止從者衣履皆濕二十里柳子又二十里華  
州住津人王同生州牧世英預備行台陳令垣在此守候未行汾陽  
故宅在少華門外里許有祠宇牌坊守祠郭姓尙不乏人聞其祖墓  
在赤水西十里東向少華山來脈明日當過之汾陽陪葬肅宗陵在  
醴泉縣東北十八里五牀山也親家王襟三觀察權稅於潼出關迎  
余閼底鎮一談入關過其局拜之夜來行台暢談次日送余至華陰  
廟談至子正而回今日冒雨送余於華陰城南別去蓋有志遠行出  
關從予也華陰以西平原開敞南北寬二百餘里東西長六七百里



產糧甚豐價亦廉夾道左公柳尙茂密聞有被土人偷伐者亦地方之責也敷水西至柳子荒地近二十里原有舊渠可以疏洩灌漑地方官疲於新政漠不關心惜哉問其致荒之由因渭河淤墊漸高南臨高山北阻淤渭水無所洩是以棄之然何不開通東西大溝直送黃河耶卽挖低培高高爲旱地低爲水田亦是一法特皆未之能解耳

初十日卯正行雨止雲猶四翳少華山仍未露出西關路北有宋寇萊公故里碑萊公華州下邽人自此至下邽鎮尙六十里今隸渭南縣在渭北五十里居黃渭之間大河華嶽會於潼關以西沃壤七百餘里寬亦二三百里天地菁英毓爲良相惟嶽降辰信然三十里赤